

Vasektomi Menurut Perspektif Islam

Pengenalan

Vasektomi merupakan suatu prosedur kawalan kehamilan kekal yang menghalang pergerakan sperma keluar ketika proses ejakulasi semasa persetubuhan. Prosedur yang ini melibatkan pemotongan struktur tiub atau saluran yang membawa sperma dari testis ke tiub *urethra* atau zakar (tempat keluar air kencing) yang dikenali sebagai *vas deferens*.

Tujuan prosedur ini dilakukan adalah untuk memastikan bahawa air mani yang keluar tidak mengandungi sperma iaitu benih lelaki. Vasektomi merupakan suatu prosedur yang kekal dan tidak dapat kembali kepada fungsi yang asal. Walaupun terdapat kaedah prosedur pembalikan semula, ia merupakan suatu prosedur yang sukar dan mahal kerana ia melibatkan pakar bedah yang berkemahiran tinggi.

Fatwa Berkenaan Perancangan Keluarga

Dari segi syarak, pada dasarnya Islam melarang umatnya lelaki mahupun perempuan daripada menghilangkan keupayaan untuk mendapatkan zuriat atau **memandulkan diri secara kekal** melainkan terdapat uzur yang dibenarkan syarak. Ulama' kontemporari telah membahaskan hukum berkenaan pemandulan yang bersifat kekal dan disebutkan di dalam kebanyakan fatwa mereka. Di antaranya adalah seperti berikut:

Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia Kali Ke-12 pada 20 Januari 1977 memutuskan bahawa hukum mengenai Perancang Keluarga adalah seperti berikut:

1. Memandulkan lelaki dan perempuan hukumnya adalah **haram**.
2. Mencegah beranak atau mengehadkan bilangan anak hukumnya adalah **haram melainkan dengan sebab yang diharuskan** oleh syarak bagi orang perseorangan.
3. Menyusun keluarga dari kesihatan, pelajaran dan kebahagiaan keluarga dengan cara yang selain daripada (1) dan (2) di atas adalah **harus**.

Persidangan *Majma' al-Fiqh al-Islami* di bawah Pertubuhan Kerjasama Islam (OIC) di Kuwait pada 1-6 Jamadilakhir 1409H bersamaan 15 Disember 1988M telah memutuskan, antara lain:

1. **Haram menghilangkan kemampuan reproduksi** daripada lelaki mahupun wanita, seperti apa yang dikenali dengan pemandulan. Pengecualian

diberikan dalam kes-kes darurat yang perlu ditimbang dengan kayu ukur yang syarie.

2. **Dibolehkan** untuk mengawal **secara sementara** kemampuan reproduksi dengan tujuan menjarakkan antara tempoh-tempoh kehamilan, atau menghentikan bagi tempoh tertentu, jika terdapat keperluan yang diambil kira oleh Syarak, berdasarkan persetujuan dan keredaan daripada perbincangan antara kedua pasangan yang sah, dengan syarat kaedah kawalan itu tidak mendatangkan mudarat, berdasarkan kaedah yang tepat dengan syariat, dan tidak menzalimi kandungan yang sedia ada. (Rujuk **Majallah al-Majma'** Siri 4 1/7)

Syeikh Atiyyah pada Mei, 1997 melalui *Dar al-Ifta' al-Misriyyah* mengeluarkan fatwa atas soalan hukum melakukan pemandulan bagi tujuan perancangan keluarga bahawa dibolehkan pemandulan atas alasan kesihatan atau selainnya bagi tempoh tertentu, dengan syarat kemampuan untuk reproduksi itu kekal dan boleh digunakan kembali apabila masa berlalu. Justeru, tidak boleh pemandulan itu dilakukan jika kesannya bersifat sempurna dan kekal sehingga hilang kemampuan dan fungsinya, melainkan wujudnya kemudaratan yang serius. (Rujuk **Fatwa Dar al-Ifta' al-Misriyyah** 47/1)

Merancang Keluarga Antara Kebajikan Atau Hawa Nafsu?

Perancangan keluarga merujuk kepada usaha yang dilakukan oleh pasangan suami isteri untuk merancang bilangan anak dan jarak kelahiran mereka berdasarkan keupayaan dan keperluan semasa. Selain itu, merancang keluarga juga adalah bertujuan menjaga kebajikan dan kesihatan isteri. Merancang keluarga boleh dibahagikan kepada dua;

1. *Tanzim al-Nasal* (تنظيم النسل)
2. *Tahdid al-Nasal* (تحديد النسل)

Tanzim al-Nasal merujuk kepada usaha untuk menjarakkan anak dengan menggunakan kaedah-kaedah seperti memakan ubatan pil perancang, melakukan perisetubuhan pada waktu tidak subur, memakai kondom, melakukan *azal* (ejakulasi luar rahim), dan mengeluarkan air mani daripada kemaluan wanita selepas selesai perisetubuhan dan memasang peranti *intrauterine* (IUD) bagi tujuan pemandulan sementara. Kaedah ini diharuskan dengan syarat-syarat berikut:

1. Meyakini bahawa Allah SWT berkuasa untuk mengurniakan anak bila-bila masa dan tiada siapa yang boleh menghalang daripada perkara tersebut berlaku serta wajib ke atas pasangan memelihara kandungan tersebut dan menjaga kebajikannya;

2. Tidak membawa kepada kemudharatan kepada pasangan khususnya isteri;
3. Dilakukan atas kebenaran dan persetujuan pasangan suami isteri.

Hal ini berdasarkan kepada sebuah *athar* daripada Jabir r.anhu:

كُنَّا نَعْرِزُ عَلَى عَهْدِ النَّبِيِّ صَلَّى اللَّهُ عَلَيْهِ وَسَلَّمَ وَالْقُرْآنُ يَنْزِلُ

Maksudnya: Kami melakukan 'azl pada zaman Nabi SAW sementara Al-Quran sedang diturunkan"

(Riwayat Bukhari 5208)

Dalam riwayat Muslim pula:

كنا نعزل على عهد رسول الله صلى الله عليه وآله وسلم، فبلغه ذلك فلم ينهنا

Maksudnya: Kami melakukan 'azl pada zaman Rasulullah SAW, lalu perkara itu sampai kepada baginda, tetapi baginda tidak melarang kami.

(Riwayat Muslim 1440)

Kebanyakan ulama fiqh bersepakat bahawa 'azl (usaha menghalang bertemunya air mani suami dengan ovum isteri) adalah dibolehkan dengan syarat kedua-dua pasangan bersetuju. Tidak dibenarkan salah seorang melakukannya tanpa persetujuan yang lain. Dalil kepada kebolehan ini ialah hadis-hadis yang menunjukkan para sahabat Nabi SAW melakukannya pada zaman Rasulullah SAW, dan baginda tidak melarangnya.

Namun, **jika 'azl dilakukan dengan tujuan untuk menghalang kehamilan secara mutlak, ia bertentangan dengan maqasid syariah yang menggalakkan penjagaan keturunan (*hifz nasl*)**. Dalam situasi yang dinyatakan, jika 'azl dilakukan tanpa persetujuan isteri, maka perbuatan itu tidak dibenarkan dan suami dianggap berdosa. 'Azl hanya dibolehkan dengan persetujuan bersama pasangan, seperti yang telah disebutkan.

Perancangan keluarga yang berbentuk seperti ini adalah dibenarkan dan tujuannya berdasarkan kepada kebajikan serta berada dalam lingkungan yang diharuskan oleh syarak. Hal ini disebabkan tiada unsur menolak ketentuan yang telah ditetapkan oleh Allah SWT dan tidak mengubah ciptaan-Nya.

Manakala, **Tahdid al-Nasal** iaitu bererti mengehadkan atau menamatkan terus kemampuan pasangan untuk mendapat anak dengan menggunakan kaedah yang melibatkan campur tangan perubatan yang kekal seperti vasektomi, *Bilateral Tubal Ligation* dan melakukan pengguguran. Kaedah ini dianggap haram kerana melibatkan perubahan ciptaan Allah, merosakkan asas kehidupan dan melakukan pembunuhan. Selain itu, ia juga merupakan perancangan keluarga yang berdasarkan

hawa nafsu kerana bertentangan dengan fitrah sebagai manusia dan menjauhi matlamat asal tujuan perkahwinan itu dibina. Di samping itu, perbuatan ini juga boleh membawa kepada menolak ketentuan Allah SWT serta memutuskan pergantungan harap kepada-Nya.

Walaupun bagaimanapun, pengecualian diberikan bagi kes yang melibatkan masalah kesihatan yang mengancam nyawa seseorang wanita seperti risiko besar kematian atau menyebabkan masalah kesihatan yang kritikal bagi ibu akibat mengandung dan bersalin. Maka ketika itu, boleh dilakukan pengguguran sebelum kandungan mencapai umur 120 hari daripada tarikh persenyawaan berlaku, atau 106 hari daripada hari terakhir haid.

Secara faktanya, agama Islam juga mengharamkan pemandulan terhadap binatang serta tidak membenarkan perbuatan tersebut dilakukan. Hal ini kerana perbuatan tersebut termasuk dalam pengubahan ciptaan Allah SWT. Jika diteliti semula, maka pemandulan kepada manusia adalah lebih utama untuk dilarang kerana manusia adalah makhluk Allah yang lebih sempurna yang telah ditaklifkan menjadi khalifah di muka bumi.

Walaupun terdapat kaedah *reverse-vasectomy* yang mampu mengembalikan kebolehmampuan untuk mendapatkan zuriat semula, namun melakukan vasektomi itu adalah **haram** kerana mengubah ciptaan Allah SWT dan membawa kepada pemandulan kekal. Ini berdasarkan firman Allah SWT tentang perkataan Iblis:

وَلَا ضَلَّتْهُمْ وَلَا مَتَّيْتَهُمْ وَلَا مَرَّتَهُمْ فَلْيَبْتِكُنَّ آذَانَ الْأَنْعَامِ وَلَا مَرَّتَهُمْ فَلْيَغَيِّرَنَّ خَلْقَ اللَّهِ وَمَنْ يَتَّخِذِ الشَّيْطَانَ وَلِيًّا مِّن دُونِ اللَّهِ فَقَدْ خَسِرَ خُسْرًا مُّبِينًا

Maksudnya: "Dan demi sesungguhnya, aku akan menyesatkan mereka (dari kebenaran), dan demi sesungguhnya aku akan memperdayakan mereka dengan angan-angan kosong, dan demi sesungguhnya aku akan menyuruh mereka (mencacatkan binatang-binatang ternak), lalu mereka membelah telinga binatang-binatang itu; dan aku akan menyuruh mereka mengubah ciptaan Allah". Dan (ingatlah) sesiapa yang mengambil Syaitan menjadi pemimpin yang ditaati selain dari Allah, maka sesungguhnya rugilah ia dengan kerugian yang terang nyata."

(Surah al-Nisa': 119)

Dalam konteks Islam, isu ini bukan sahaja perlu diteliti dari sudut pandang hukum syarak, tetapi juga kesan sosial dan moral yang mungkin timbul daripadanya. Salah satu kebimbangan yang boleh diketengahkan ialah bagaimana prosedur ini berpotensi menggalakkan amalan perzinaan.

Prosedur *vasectomy* secara asasnya menghapuskan kebimbangan lelaki terhadap risiko menyebabkan kehamilan. Ini boleh membawa kepada kecenderungan sesetengah individu untuk terlibat dalam hubungan seksual tanpa ikatan perkahwinan,

kerana mereka tidak lagi bimbang akan implikasi kehamilan yang sering menjadi penghalang utama kepada perzinaan. Dalam hal ini, *vasectomy* boleh mencetuskan normalisasi tingkah laku yang bercanggah dengan syariat Islam.

Allah SWT dengan jelas melarang perbuatan zina, malah memerintahkan umat Islam untuk menjauhi segala perkara yang boleh membawa kepada zina, Allah SWT berfirman:

وَلَا تَقْرَبُوا الزَّيْنَةَ إِنَّهُ كَانَ فَاحِشَةً وَسَاءَ سَبِيلًا

Maksudnya "Dan janganlah kamu mendekati zina; sesungguhnya zina itu adalah suatu perbuatan yang keji dan suatu jalan yang buruk."

(Surah Al-Isra': 32)

Ayat ini bukan sahaja melarang zina secara langsung, tetapi juga menegaskan supaya menjauhi segala pintu yang boleh membuka ruang kepada perbuatan tersebut. Jika *vasectomy* digunakan untuk memberi "jaminan" kepada individu agar tidak bimbang tentang kehamilan, ia secara tidak langsung boleh dianggap sebagai satu pendorong kepada zina dan melanggar perintah ini.

Islam sangat menekankan pentingnya institusi perkahwinan sebagai asas kepada hubungan antara lelaki dan wanita. Salah satu hikmah kehamilan adalah mengukuhkan ikatan perkahwinan dan menanamkan tanggungjawab bersama. Apabila risiko kehamilan ditiadakan melalui *vasectomy*, hubungan seksual mungkin dilihat semata-mata sebagai satu bentuk kepuasan fizikal, tanpa tanggungjawab moral dan sosial yang sepatutnya. Ini boleh mengakibatkan peningkatan gejala sosial seperti hubungan luar nikah.

Prosedur ini juga berpotensi membuka ruang kepada nafsu yang tidak terkawal kerana ketiadaan rasa takut terhadap akibat jangka panjang seperti kehamilan. Individu yang telah menjalani *vasectomy* mungkin lebih mudah terdorong untuk mencari pasangan seksual secara bebas, tanpa memikirkan kesan moral dan agama. Ini bertentangan dengan prinsip Islam yang menggalakkan kawalan diri dan penjagaan maruah dengan perkahwinan dan amalan berpuasa. Rasulullah SAW bersabda;

يَا مَعْشَرَ الشَّبَابِ، مَنْ اسْتَطَاعَ مِنْكُمْ الْبَاءَةَ فَلْيَتَزَوَّجْ، فَإِنَّهُ أَغْضُ لِلْبَصَرِ وَأَحْصَنُ لِلْفَرْجِ، وَمَنْ لَمْ يَسْتَطِعْ فَعَلَيْهِ بِالصَّوْمِ، فَإِنَّهُ لَهُ وِجَاءٌ

Maksudnya: "Wahai golongan pemuda! Sesiapa di antara kamu yang mampu berkahwin, maka berkahwinlah, kerana ia lebih menundukkan pandangan dan lebih memelihara kehormatan. Dan sesiapa yang tidak mampu, maka hendaklah dia berpuasa kerana ia adalah benteng (dari nafsu)."

(Hadis riwayat Bukhari, No. 5066; Muslim, No. 1400)

Kesimpulan

Sehubungan dengan itu, menentukan kelahiran dengan maksud menghentikan kemampuan untuk melahirkan anak secara kekal seperti menggunakan kaedah **vasektomi adalah haram dan tidak dibenarkan**. Hal ini kerana ia bertentangan dengan maqasid syariah dan fitrah manusiawi.

Namun, merancang kelahiran dengan kaedah sementara seperti menggunakan alat pencegah kehamilan atau pil perancang untuk menjarakkan tempoh antara kehamilan bagi menjaga kesihatan ibu, melindunginya daripada mudarat akibat kehamilan yang kerap, atau untuk membolehkannya memberi tumpuan kepada mendidik anak-anak yang sedia ada, adalah **dibenarkan** secara syarak. Ini tidak bertentangan dengan nas-nas sunnah, berdasarkan qias kepada hukum 'azl.

Disediakan oleh;

Unit Buhuth, Bahagian Fatwa,
Jabatan Mufti Negeri Pulau Pinang
Januari 2025